



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma : Tir Yimyim

tiryimyim@aolima

tir yimyim

TAPAK 8

Russia-i Kim dang hypersonic missile, nuclear-capable bomber tem sayu

Lyon head coach mapa abentsü Fabio Grosso shimogo

VOL. XX NO. 336 (ADOK 336)

DIMAPUR AMUNGNÜ (SUNDAY)

RONGJUI (SEPTEMBER) 17, 2023

₹ 5.00

Opposition maliba sorkar ya Naga yimten tekaraba nung latettsü atema lir: CM Rio

Kohima, September 16, 2023 (TYO): Nagaland State Assembly nung political party ajak nungi MLA tem külemi longjemba ya tekaraba nung Naga yimten latettsü rongshitsü atema lir ta Chief Minister Neiphiu Rio-i ashi.

Taküm February ita assembly election sülen tanü State Banquet Hall, CM's Residential Complex nung mezüngbuba Nationalist Democratic Progressive Party (NDPP) General Body Meeting nung pai iba olen jembu.

"NDPP atema tongtipangtiba mapaji Naga yimten tebilemstü lir aser asenoki teyariteper tajung ka aser tekaraba nung latettsü atema inyaktüsü nangzüka lir" ta CM Rio-i ashi.

"Asenok lenisüba atema masü saka Naga yimten tebilemstü atema longjemba lir. Onok indang tongti teinyaktüsü Naga yimten latettsüba lir aser iba atema maneni inyaka aotsü" ta pai ashi.

"Nagaland nung opposition maliba sorkar akümba atema nisung karibo aitsüogo. Iba sorkar ya ochimashi aser ozüng alema tentetba asütsü ta nisungtem jembu saka party maliba sorkar ajanga maparen ajak nung tashishitsü melii inyaksangshia arudar" ta CM-i ashi.

"NDPP tenteter küm 6 dang lir saka asenoki alliance partner BJP teyari ajanga state general elections anaben tashi atongtepa

takok ngutetogo. Taküm election nungbo tanga political party temia opposition maliba sorkar akümtsü atema yaritepogo" ta paisa metetdaktüsü.

Nagaland ya khuret aika aliba state ka lir aser asen rongsen kecha mali. Iba jagi state sorkari Centre teyari nungdaker, ta Rio-i ashi.

Centre den tesentaktep ali yonga state sorkari Naga nung atema mezüng temulung agütsür anungji nübertemi NDPP pusemer. 2018 election nung NDPP indang yimyim 'Change is coming' liasü aser tan election nung Nagaland tematiba jenjangi ajungkettsü alizüng lir, ta paisa shisem.

"Onoki langka danga inyaktetra ibaji party lennirtem aser züngsemtemi bendanga agütsüba aser tenangzüka agia inyakba ajanga lir" ta CM Rio-isa ashi.

Paisa NDPP züngsem ajak dang party tangatetba aser tesayuba nung ammettsü aser Naga nung maitsü kümzüka aser wazüka ayutsü ayongzük.

CM Rio-i NDPP züngsemtem dang sorkar scheme balala- Chief Minister's Health Insurance Scheme, Chief Minister's Micro Finance Scheme aser Register of Indigenous Inhabitants of Nagaland indang osangtem ajaklen prokshitsü atema ayongzük.

Shishilembartem asoshi teyari agütsüba sentong agi

Mokokchung, September 16 (TYO): Mokokchung Municipal Council (MMC) Conference Hall nung District Urban Development Agency (DUDA) aser Mokokchung Municipal Council (MMC) semtepa September 16 nü nuburtem shirnok special micro credit scheme koba PM Street Vendors Self-Reliant Fund (PM SVANidhi) koba yimya nung lemsa-a agütsüsü iba indang shisa lemsatepba sentong ka agiogo.

Tanu iba sentong nung ADC & Chairman, DUDA, Mokokchung, Chumlamo Humtsoe-i lenmangtem

nung chiyungtsü ayokertem aser shishilembartem dang talisa Covid-19 mapang nung takoksa ajurur lir parnok nem tama maoangka agütsüsü ta ashi.

Kasa sentong nung Mokokchung nung aliba bank-tem nungi Bank Manager-tem arua adenertemia shishilembartem nem teyari agütsüsü asoshi muluna lir saka parnokki nungtakba kuli kakettep shitak alitsüla ta metetdaktüsü.

Iba sentong nung lenmangtem nung chiyungtsü ayokertem aser shishilembartem aika aden.

Mkg nung Ayushman Bhavah campaign agütsü

Mokokchung, September 16, 2023 (DPRO): Mokokchung nung Ayushman Bhavah Campaign atema District Task Force senden ka menogo.

Iba senden ya Mokokchung ADC Chumlamo Humtsoe menden ser amen aser pai Ayushman Bhavah Campaign indang nükjidongtem den SDG goals metetdaktüsü.

Mokokchung Chief Medical Officer (CMO)-ia o jembidang Ayushman Bhavah Campaign indang tongtipang onük asem ashi.

"Onük asemji Ayushman Apke Dwar 3.0, Ayushman Sabha aser Ayushman Mela lir. Iba campaign ajanga Mokokchung district kübok yimtsüng 42 asemstü" ta Mokokchung CMO-i ashi.

Iba Campaign atema telok 10

tentettsü aser telok shia shia operator anana alitsü. Telok ka reserve nung ayutsü aser 9 ji RD Block shia dangi yoktsü senden nung lemetet.

Mokokchung district nung department balala nungi operator ka den NSRLM nungi Data Entry Operator kaka block shia nung lezmüksütsü aser DEO-i laptop o biometric devices anepalutsü ta tanü senden nung lemetet.

Maneni DEF, Mokokchung ajanga operators senzusenbongtsü gari anepalutsü aser POL nung sen endokba agütsüsü. Maneni DPRO, Mokokchung ajanga osangkakettem aser All India Radio nung iba dak sendakba osang prokshitsü ta tanü senden nung lemetetogo.

Municipal tentet 3 aser town council-temi bangzüng 4 renem



Kohima, Dimapur aser Mokokchung yimti nungi municipal tentet asem (3) aser Nagaland nung aliba town council 36 densema tanü Sept 16, 2023 nü Hotel Whispering Winds, Mokokchung nung telungjem sensaksem senden nung adenertem külemi tangokba noksa angur.

Mokokchung, 16th Sept (TYO): Kohima, Dimapur aser Mokokchung yimti nungi municipal tentet asem (3) aser Nagaland nung aliba town council 36 densema tanü Sept 16, 2023 nü Hotel Whispering Winds, Mokokchung nung telungjem sensaksem senden ka amen.

Iba senden nung tesentepertemi bangzüng pezü (4) renema liasü, ta All Kohima Municipal Ward Panchayat (AKMWP) tir, Thejao Sekhose, Dimapur Urban Council Chairmen Federation (DUCCF) tir, Zasiwikho Zakiesato aser All Ward Union Mokokchung Town (AWUMT) tir, Limanungang parnoki senden temer osangbener den jembidang metetdaktüsü.

Iba senden nung tongtibangsa ULB election dak sentakba nung Supreme Court-i koba keno

angadangtsü asoshi Sept 26, 2023 nü jaoka lir, iba indang tatsü talang aika asadanga jembir tatemang nung teloki bangzüng kar renema ayu, ta parnoki metetdaktüsü.

Mezüngbuba bangzüngji; Nagaland Government o People's Union for Civil Liberties (PUCL) na okadak jembiba maparen dak sentakba nung Nagaland nung municipal tentet asema atongsema lir, iba keno supreme court nung tang tejembidak lir, aji oda, court nungi obendang atadang, tanü sentepertemi sorkar, kin hoho-tem, tetsür aser kaketshir telok tentet balala aser political party-temi Nagaland Municipal Bill 2023 nung ajemdaker ULB election agütsü agizüka bangzüng renemba asoshi tenüngsang agütsür.

Tanabuba nung, Nagaland

sorkari 9th March, 2022 aser 1st Sept. 2023 nü telungjem sensaksem senden takok ngua ayongba den ULB's election-ji kin hoho-tem shisatsü aser telemteba nung ajemdaktüsü renemba asoshi pelar.

Tasembuba nung, Naga nung arok ajungtsü atema Article 371 (A) wazüka aser kümzüka ayutsü asoshi tekümdangtsü lenmang kar bushia inyaktüsü kin hoho-tem dang mepishitsü lemetet.

Pezübuba nung, Nagaland Municipal Bill 2023 ozüng makümdang Article 371 (A) anemba onüktem katidaktüsü aser iba bill ozüng kümür külena telungjem sensaksem akatsü atema Select Committee dang mepishitsü lemeteta liasü, AKMWP, DUCCF aser AWUMT ketdangpurisa metetdaktüsü.

NDPP-i Naga yimten tekaraba nung latettsü mepishir

Kohima, September 16, 2023 (TYO): Nationalist Democratic Progressive Party (NDPP)-i Naga yimten tekaraba nung latettsü atema pusema nungitüsü maneni bangjemtepogo.

Parnokisa Centre dang tekaratiba nung yimten latettsü atema maparen inyaktüsü mepishia metetdaktüsüogo.

"Nisung ajaki akhümtsübuttsü aser agizüktettsüsa Indo-Naga yimten latettsü pusema nungiter. NDPP-i Indo-Naga yimten olemtep nung adenertem aser talisa India sorkar dang tekaratiba nung yimten latettsüsa mapa inyaktüsü maneni mepishir" ta Honibarnü NDPP lokti senden nung bangjemtep.

NDPP-isa Manipur nung kin o kin raraba atema süoki ia bilema Manipur nung alirtem aser India o Manipur sorkartem dang mepetmesü angatetteptsü atema mepishia metetdaktüsüogo.

NDPP-isa election nung "Towards a state of excellence" yimyim ayimoktsüba atongtsü atema anibelem arema inyaktüsü bangjemtep. Parnokisa Nagaland nung alirtem dang iba alizüng

atongtsü atema maneni yariteptsü ayongzük.

Nagaland nung alirtemi Chief Minister, Neiphiu Rio aser Party President, Chingwang Konyak na lenisüba kübok NDPP-i aniba Peoples Democratic Alliance (PDA) tanaben takok ngudaktüsüba atema pelar ta NDPP-isa metetdaktüsü.

2023 general elections nung Prime Minister, Union Home Minister aser Bharatiya Janata Party (BJP) National President, J. P. Nadda nungeri Nagaland nung nüboyimtsüba atema pelar. Iba ajanga PDA-i kümsük tanaben atongtepa takok nguogo ta NDPP-isa ashi.

"Neiphiu Rio-i kümsük pungu atongtepa Chief Minister inyaktüsü takok anguba atema pa nem tenüngsang agütsür" ta NDPP-isa metetdaktüsü.

CM Rio aser party lennirtemi tetsür candidate ana nem ticket agütsüba aser iba ajanga Nagaland Legislative Assembly (NLA) putiotsü nung Salhoutuonuo Kruse aser Hekani Jakhalu nati mezüngbuba tetsür MLA inyaktüsü maangka agütsüba

atema tenüngsang agütsür ta NDPP-isa ashi.

14 buba Nagaland Legislative Assembly (NLA) züngsemtemi Nagaland Urban Local Bodies (ULB) Bill 2023 benokba aser tetsür nem 33% lezmüksütsü atema Select Committee nem agütsüba atema pelar, ta parnokisa shisem.

Maneni, Nagaland nung political party ajaki Chief Minister lenisüba pusema nungitba atema pelar. Iba ajanga Indo-Naga yimten tebilemstü latettsü atema Nagaland nung opposition maliba sorkar ka kümteptogo ta NDPP-isa ashi.

Prime Minister Narendra Modi aser India sorkari tawa New Delhi nung G20 summit takok ngua amongba atema tenüngsang agütsür. Iba ajanga alima nung India jenjang tajung akümba sayur. Nagaland-ia India G20 Presidency pusema April 4-6, 2023 tashi B20 summit ka ayonga agiogo, ta parnokisa ashi.

NDPP-isa Prime Minister aser India sorkar dang "Chandrayan-III" ita nung tua anentetba atema tenüngsang agütsüogo.

Jubilee Memorial College nung awareness sentong ayongzüka agi



Dimapur, Rongjui/September 16 (TYO): IQAC, Red Ribbon Club aser JMC Health and Wellness Club den longjemer Jubilee Memorial College-i, September 16 nü menstrual hygiene dak sendakba nung awareness sentong ka ayongzüka agiogo. Iba sentong nung tetsür kaketshirtem ajaki shilem agia liasü.

Sentong nung shisalen agütsürtemji Dr Maongkala (Medical Officer) aser Dr Temjensangla Pongener (Associate Professor, FAC) department of Geography na

liasü. Iba sentong ya Asst Professor aser Jubilee Memorial College, RRC Nodal Officer Chubaienla lenisüba nung agia liasü.

Sentong nung Dr Maongkala-i, menstrual hygiene junga anepalutsü, menstruation mapang sanitation tapet, sanitary pads tapet amshitsü koda tongtibang aser menstrual hygiene meshidakba ajanga tashidak atokbatem indang lemsatepa liasü.

Maneni Dr Temjensangla Pongener-i, organic reusable

pads tem amshiba ajanga health tajangzüktem indang lemsatep. Laisa, pads amshiba indang aser iba ajanga tzümpung aser health ajangzükba indang lemsatepa liasü. Maneni lai kaketshirtem dang sü agi yangluba pads tem amshitsü ajungshi, koba tajangzük aika lir.

Session tanga ka nung Dr Temjensangla-isa, kumba sü tejen agi reusable organic pads koda yanglutsü iba indang tangazükba agüja liasü.

Sentong nungsa Health and Wellness Club, JMC Coordinator Yimyatetla-i (5th Semester) tepela o jembia liasü.

SCPD-i ayongzüka anogo ana training sentong agiogo



The State Disability Commissioner aser shisalen sayur den Inclusive Education and Universal Design for Learning training sentong nung shilem agirtem tangokba noksa nung angur.

Dimapur, Rongjui/September 16 (Agencies): Bumblebee Inclusive School, Kohima aser Shishu Sarothi Regional Center for Disability Studies and Action (SS-RRC-DSA), Guwahati den longjemer Nagaland State Commissioner for Persons with Disabilities-i ayongzüka September 14 aser 15 nü Hotel Japfü, Kohima nung Inclusive Education and Universal Design for Learning dak sendakba nung anogo ana training sentong kaogo.

Training nung PwD tem lokti nung züngoksemtüsü asoshi tetsüdahtüsü adokba aser iba ya kodaser bentettsü iba indang sensaksema liasü. Training nungsa mata mabensartem nem lenmang sadema lapoktsütsü koda tongtibang, iba dak sendakba nung tangazükba agütsütsü, parnok mesenmetui mamshitsü aser mata mabensartem jenjang tajungba kümdaktsütsü asoshi sentong balala yangluba nung shilem agitsü koda tongtibang iba indang tongtibangsa tangazükba agüja

liasü. Sentong nung shilem agirtem Universal Design for Learning yangluba nung shilem agia liasü, koba ajanga tesayurtem nem lenla ajak ayimjema tesayuba agütsüba aser tanurtem teyongtsü südahtsür sayuba nung teyari agütsütsü.

Training shitak agütsür aliba professional tem aser tangazükba shitak agüja maliba ajanga mata mabensa aliba tanurtem mapang talangka sentoka aruogo. Anungji iba training ya Inclusive Education ka asoshi tesayurtem aser school tekolaktem renemtsütsü nükjidong nung agia liasü. Mata mabensartem anioka inyaksangshitsü mulunga aliba ajanga dang ajak züngoksemtettsü.

Iba training sentong nung Nagaland Board of School Education, Samagra Shiksha, DIET Chiechama, Sazolie college of Teacher Education, Nagaland University, The Vineyard School, Jo foundation Inclusive School, Mt. Hermon

Hr.Sec School, JGHS Viswema, GMS Viswema, GMS New Sectt Area, GMS Nagabazar, GMS Jakhama, GMS Bayavu, Jewel Pre School, Ministers' Hill Baptist Hr. Sec School, Mt. Sinai Hr. Sec School, Alderville Hr.Sec.School, Vinyuzo Hr.Sec.School, Oking Christian School, Cherry Blossom School, Bumblebee Inclusive School, Coraggio School aser Northfield School nungi shilem agia liasü. Iba training sentong nung ajak senteper nisung 45-i shilem agiogo.

Anogo ana training sentong ya State Commissioner for Persons with disabilities Diethono Nakhro-i o tatsüka jembir tembang, shibai training nung shilem agirtem nem tenüngsang agütsü aser ashiba agi, parnoki shilem agiba ajanga parnok den longjemer Inclusive Education ya takoktsü ka akümtsü.

Maneni sentong nungsa shilem agirtem nem kuli kakets agütsü aser tepela anküp o Kezhalenuo Savi-i jembia liasü.



Jakhama nung September 15 nü "Village Council Act, Customary Laws, Social Audits and Creating Women and Child-Friendly Proposals under VDB" dak sendakba nung Bachao Beti Padhao Sensitization sentong nung SDO (C) Jakhama, Nockpai Konyak NCS-i o jembiba noksa nung angur.

Sept 26 nü NLA PAC senden ayonger

Dimapur, Rongjui/September 16 (TYO): Committee on Public Accounts mendenbuba aser MLA Mhathung Yanthan-i, Departmental Representatives tem den Public Accounts Committee, Nagaland Legislative Assembly, Public Accounts Committee, Oral Evidence senden ka September 26 nü 11 ako nungi tenzüka agitsü ayongzükogo.

Senden nung Justice & Law aser PWD (Housing) Department indang sensak asemtsü.

2018-2019 küm atema

General, Economic and Revenue Sectors dak sendakba nung Comptroller and Auditor General of India indang report Committee-i, sorkar department ana indang Audit para(s) dak sendakba nung oral evidence agitsü.

Anungji ken o dak sendaka aliba department ana indang AHOD aser HOD tem dang senden ayongba anogo densema alitsü asoshi metetdaktüsügo.

Maneni committee züngsem ajak dang iba senden nung tamakok maludaktsüi arua shilem agitsü metetdaktüsügo.

Jubilee Memorial College nung awareness sentong ayongzüka agi



Dimapur, Rongjui/September 16 (TYO): IQAC, Red Ribbon Club aser JMC Health and Wellness Club den longjemer Jubilee Memorial College-i, September 16 nü menstrual hygiene dak sendakba nung awareness sentong ka ayongzüka agiogo. Iba sentong nung tetsür kaketshirtem ajaki shilem agia liasü.

Sentong nung shisalen agütsürtemji Dr Maongkala (Medical Officer) aser Dr Temjensangla Pongener (Associate Professor, FAC) department of Geography na liasü.

Iba sentong ya Asst Professor aser Jubilee Memorial College, RRC Nodal Officer Chubaienla lenisüba nung agia liasü.

Sentong nung Dr Maongkala-i, menstrual hygiene junga anepalutsü, menstruation

mapang sanitation tapet, sanitary pads tapet amshitsü koda tongtibang aser menstrual hygiene meshidakba ajanga tashidak atokbatem indang lemsatepa liasü.

Maneni Dr Temjensangla Pongener-i, organic reusable pads tem amshiba ajanga health tajangzüktem indang lemsatep. Laisa, pads amshiba indang aser iba ajanga tzümpung aser health ajangzükba indang lemsatepa liasü. Maneni lai kaketshirtem dang sü agi yangluba pads tem amshitsü ajungshi, koba tajangzük aika lir.

Session tanga ka nung Dr Temjensangla-isa, kumba sü tejen agi reusable organic pads koda yanglutsü iba indang tangazükba agüja liasü.

Sentong nungsa Health and Wellness Club, JMC Coordinator Yimyatetla-i (5th Semester) tepela o jembia liasü.

Jakhama nung Beti Bachao Beti Padhao Sensitization Programme ayongzüka agi

Dimapur, Rongjui/September 16 (TYO): Kohima District Administration aser District Hub for Empowerment of Women, Kohima na longjemer "Village Council Act, Customary Laws, Social Audits and Creating Women and Child-Friendly Proposals under VDB" dak sendakba nung Beti Bachao Beti Padhao Sensitization sentong ka September 15 nü Jakhama jila nung ayongzüka agiogo.

Nockpai Konyak (NCS), SDO (Civil), Jakhama-i okila jembiba mapang district nung benoka inyaksangshiba BBBP scheme aser inyakyimtem indang metetdaktüsü. Pai, "Nagaland Village and Tribal Council Act, 1978" onük nung ajemdaker jembai aser yimtsüng nung telemetba balala agiba aser sentong yangluba nung tetsürtem nem shilem agidaktsütsü ayongzüka liasü.

"Social Audits and Creating Women and Child-Friendly Budget" onük nung ajemdaker jembiba mapang BDO Jakhama, Vilophi-i, social audit ya lokti temelenshi, lokti-i shilem agiba aser sorkar accountability asoshi tongtibang hadir ka lir ta ashiba

den tajangzük, tongtibang features tem lemsatep aser social audit ajanga temelenshi bener aruba nung tongtibang ketdangsurtem khuret aser stakeholder tem shilem lemsatepa liasü.

"Women Centric Programmes and Schemes," indang jembiba mapang Gender Specialist, DHEW, Kohima Vikeduoza Sorhie-i, Mission Shakti aser iba scheme indang sub-schemes- Sambal (Safety and security for women) aser Samarthya (Empowerment of women) indang tatongi rasa ashi. Paisa, Pradhan Mantri Matru Vandana Yojana (PMMVY) scheme kübok tajangzük agitsü atema tenüngdakba aser shirnoki iba ya agitettsü iba indang tatsü agi rasa ashi. Tetsürtem kümzüka toktsütsüba indang jembiba mapang pai, Sakhi- OSC aser Women Helpline 181 rangloker jembai aser item ajanga koda tetsürtem tebilemtsü bentettsü, iba indang lemsatep.

Iba sentong nung Jakhama & Kezocha circle kübok village council, vdb, SHG tem, tetsür aser lanur lokti tentet balalai shilem agia liasü.



Lucknow, September 16, 2023: Tawa lawyer tem dak azükba anema longkak aitba nung pusemsü atema Honibarnü lawyer tem Lucknow nungi Hapur-i apusotsü lia tangokba noksa nung angur.

Nisung 8,000-i temang shilem tenla agütsütsü tenangzükba agi

New Delhi, Rongjui/ September 16 (Agencies): Honibarnü Agra nung sentong ka Union Health Minister, Mansukh Mandaviya leniba nung nisung 8,000 dak temai temang shilem tenla agütsütsü atema tenangzükba agiogo.

Iba sentong nung jembidang Health Minister-i, "Taküm alidang azü tenla agütsütsüla aser siadokba sülen temang shilem tenla agütsütsüla," ta ayongzük.

Mandaviya-isa, sorkari temang shilem melener sensakertem treatment agiba mapang nung ita shia sen meyirjang terer (10,000) teyari agütsütsü, ta metetdaksü.

"Parnok mapang shia check-up agitsü atema sokari anepalutsütsü," ta pai ashi.

2024 küm tatemlen tashi nungbo linük nung aliba hospital

aser medical college ajak nung temang shilem bendentsü atema achaayangtsü, ta pai metetdaksü.

Agra nung aliba GIC ground nung lokti den jembidang Mandaviya-i, tangar taküm ka kümzüktsü atema temang shilem tenla agütsütsü temeim dang nungi temeim tuluba mali, ta ashi.

Union health minister-isa Sarojini Naidu Medical College (SNMC), Agra nung super specialty block ka semzüktsü aser organ donation registry tenzüktsüogo.

Temang shilem tenla agütsütsü atema register asütsü asoshi Aadhaar number aser Aadhaar-linked mobile number dang nungdaker, ta pai ashi.

Mandaviya-i, SNMC nung super speciality block ji ali tasazük 7,890 sq. metres nung

sen crore 200 indoka yanglu, ta metetdaksü.

Agra nung aliba SNMC ajanga Agra nung alirtem dang masü saka district 11 den anasa aliba state tem nungi nisung crore 3 shi tajangzük angutsü, ta pai ashi.

SNMC nung aliba super speciality block nung neurosurgery, neurology, gastroenterology, gastro surgery, urology, nephrology aser cardiology services agütsütsü.

Kasa anogo nungsa Minister-i integrated public health labs 23 aser block public health units 87 atema foundation lung azüngtsüogo.

Mandaviya-i, linük nung healthcare ajungkettsütsü aser healthcare facilities ulushitsü atema Narendra Modi sorkari mera aika agia inyakdar, ta metetdaksü.

Centre sorkari Sainik school tasen 100 amenoktsü atema agizükogo

New Delhi, September 16 (Agencies): Centre sorkari linük tesem balala nung Sainik School 100 dak tema amenoktsü atema telemtetba agiogo; iba mapatong ya shilem balala lemsar inyaktsü aser melungtet teloktem, nija school aser state sorkartem den longjemer inyaktsü.

Sainik Schools Society-i linük tesem balala nung aliba Sainik school tasen 19 atema memorandum of agreement (MoA) agiogo, ta Honibarnü Defence Ministry-i sangdong ka nung metetdaksü.

Defence Minister, Rajnath Singh-isa partnership nung Sainik School tasen 23 amenoktsü atema agizükogo, anungji Sainik School Society kübok item school tasen 46 amenoktsü.

Ketdangsertemi ashiba agi, iba mapatong nukjidong ya National Education Policy tasenba kübok shisaliok lirumedema agütsütsü aser Armed Forces densema mapa balala nung maongka agütsütsü atema lir.

Iba dak alia iba mapatong ajanga linük yangerba nung

shilem agitsüsa lanurtem senso tajung kaka kümdaktsütsü atema sorkar den amalitepa inyaktsü asoshi nija sectors nem maongka agütsütsü atema lir, ta ketdangsertemi metetdaksü.

Sainik School tasen ajakji Sainik Schools Society-i ketdangtsütsü aser lateta aliba temzüng den telatetbatem kübok alitsü. Iba dak alia affiliated board curriculum kübok inyaktsü.

Sainik school-isa kaketshirtem nem Academic PLUS curriculum agütsütsü.



September 16, 2023 nü Ato kilonser, Narendra Modi asoba anogomong nung Surat nung school tanurtemi Ato kilonser noksa amer tangokba noksa nung angur.

Sept. 23 nü 'One Nation One Election' committee senden amentsü

New Delhi, September 16 (Agencies): September 23, 2023 nü taoba mapang India Tir, Ram Nath Kovind leniba nung 'One Nation One Election' committee mezüngbuba senden amentsü.

Linük nung General elections den külemi state assembly elections mapang ka nung dang agitsü atema asadangtsü asoshi "one nation, one election" committee tenteta liasü.

Honibarnü Ram Nath Kovind-i twitter ajanga, "Mezüngbuba senden ('One Nation, One Election' committee) September 23 nü amentsü," ta metetdaksü.

Ram Nath Kovind leniba nung züngsem 8 aliba committee jagi linük nung election ajak külemi agitsü atema lenla ajaklen nungi asadangba sülen parnok tebilemba benoktsü.

Iba committee nung züngsemtem rongnung Union

Home Minister Amit Shah, Lok Sabha nung Congress lenir Adhir Ranjan Chowdhury, taoba mapang Rajya Sabha nung opposition lenir Ghulam Nabi Azad aser taoba mapang Finance Commission chairman NK Singh nung lir.

Kasa committee nung züngsemtemji taoba mapang Lok Sabha Secretary General Subhash C Kashyap, senior advocate Harish Salve aser taoba mapang Chief Vigilance Commissioner, Sanjay Kothari nung lir. Iba committee senden nungji Law Minister, Arjun Ram Meghwal alakteta jaoker ama adentsü aser committee nung secretary ji Legal Affairs Secretary, Niten Chandra asütsü.

Committee-isa 'one nation, one election' atema linük temzüng kübok Representation of the People Act den tanga ozüng kar yanglushitsü asoshi asadangtsü.



September 16, 2023 nü Mumbai nung Union Minister for Information & Broadcasting, Anurag Thakur aser BJP MP, Hema Malini nati coffee table book 'Chal Mann Vrindavan' sayatsüdang tangokba noksa nung angur.

J&K kübok Uri nung kiralongrar asem khaset

New Delhi, Rongjui/ September 16 (Agencies): Honibarnü Jammu & Kashmir nung Baramulla district kübok Uri jila nung sepaitem aser kiralongrartem tsüngda khatepdang kiralongrar asem khasetogo, ta police-i metetdaksü.

Kashmir Zone Police-i X ajanga, "Ano kiralongrar ka khasetogo (ajak senteperbo asem). Maneni kiralongrartem mita odar. Tesülen osang tejangja metetdaksütsü," ta lemsatap.

Army temi, kiralongrar asemita India arrtsü telungi aittsü merang, ajisüaka sepaitemi parnok nokdangtetogo, ta metetdaksü.

"Tanep Baramulla kübok Uri sector nung aliba Line of Control nung Indian Army, Jammu & Kashmir Police aser intelligence agencies-i kiralongrartem arrtsü adena aittsü aliba nokdangteta liasü," ta Army Chinar Corps-i metetdaksü.

Honibarnep sepaitemi kiralongrar ana khasetba sülen ghonda ishika dang lir ano kiralongrar ka khaset. Tasümg anabo nguteta bener aruogo saka Pakistan nung

post ka nungi injang maneni khaloktsüba agi kiralongrar ka tasümgbo bener maruteter, ta metetdaksü.

Indian Army den aser Jammu & Kashmir Police na senteper tanü agi anogo pezünübuba Anantnag district kübok kiralongrartem mita aoer. Kiralongrartem atsüka aliba tesem metettsü atema army temi drones-a amshidar.

Bodhbarnü Army aser police nati Anantnag kübok Gadool yimda kiralongrartem mita ao, kechiyong iba tesem nungji kiralongrar 2-3 shi atsüka lir, ta metetdaksü.

Hokolbarnü sepaitemi, "Anantnag nung kiralongrartem mita aoba mapang nung ano sepai ka süogo. Yashi nungi pa samar liasü. Sepaitemi Anantnag area nung kiralongrartem mita aoba mapang nung drones amshia kiralongrartem aliba tesem jangjaba sülen grenades amshia amaker," ta ketdangsertemi metetdaksü.

Kiralongrartemji The Resistance Front (TRF) nungi asütsüa akok, ta bilemer. Iba telok ya Pakistan-i pusemba Lashkar-e-Taiba (LeT) telok nungi jakzükba lir.



TIR YIMYIM YIMOBILEM (EDITORIAL)

DIMAPUR AMUNGNÜ, RONGJUI (SEPTEMBER) 17, 2023

Ain aser tashi nung jembiba

Yihuda nungertem dang Tsüngrem o sayubaji Yisu Khrista arur külen dang Pai sayu masü saka Pa alimai marudangyongi tesayurtembo aika liasü. Ajisüaka, Yisui jembiba Tsüngrem o den tangar tesayurtemi jembiba Tsüngrem o naji tepila talangka liasü. Ibaji asenoki Mark 1:22 nung, nübortemi Yisui sayuba nung süngmang, kechiaser pai tezülurtem ama masü saka ain aketba nisung ka ama sayu ta shia angur. Tetezü, Yisu marudangyongi Tsüngremi nübortem asoshi temzüng ozüng aser Laishiba agüjadoker liasü. Ibayongji, Sinagog nung tezülurtemi nübortem dang Tsüngrem o sayu aser yamaji Farisi aser tezülurtemia Tsüngremi agütsüba ozüng ajak benshitsü meranga liasü. Ajisüaka, Yihuda nungter tesayurtem asoshi Tsüngremi agütsüba o ji ain aketba taküm o ka masü saka akhi tatalokbatem bendenba otsü kaket amato ka dang liasü. Parnoki Laishiba nung zülua aliba yimsübo benshi saka Tsüngremi aginübabo meinyak. Parnoki Tsüngrem o bushi saka yang nung jagi parnoki Tsüngrem ain aser tashiji mengutet. Ajisüaka, kodang Yisui Tsüngrem o bushi aser jembiba, Paibo tebu Tsüngremi agütsüba ain aser tashi nung jembiba. Akhi Yihuda nungter tesayurtem amaji tanüa asenoki Laishiba azünger saka mangatetter, Tsüngrem o jembir saka Tsüngremi aginüba ama mejembitetter ta asüba tia nung asenok tanüla nung rosepba asenoki metetter. Yohan Baptistsübai Yohan 3:27 nung asenoki melamelaa angatetsüsa Tsüngrem o ka shia lir, ibaji " Kotak nungi nisung nem kechi agütsüdir, iba dak alema pai kecha angutsü makok." Tetezü, Tsüngrem o, Pa tashi aser Pa shisatsü angatetsüsbaji Kotak nungi dang Tsüngremi agütsütsü. Aji oda, kotak nungi agütsüba ain aser tashiji asenok dak melira asenoki Tsüngrem o angatetsü makok. Tsüngrem o sayuba nung Yihuda nungter tesayurtem o Yisu na tsüngda tepilaji Yihuda nungter tesayurtemi Tsüngrem o ji Tsüngrem ain medeni sayu saka Yisui Tsüngrem ain nung sayu. Tetezü, Yihuda nungter tezülurtemi Tsüngrem o ji Tsüngrem ain nung mesayu, anungji nübortemia mangatet saka kodang Yisui sayu idangjibo parnoki süngmang, kechiyong parnok asoshi Tsüngrem o ji tesüngmangtsüka liasü. Tanü asenoki sayutsüngir saka tanüla nung sayutsüngi mesütetter, Tsüngrem o jembir saka teratet magütsütetter, Laishiba azünger saka mangatetter ta asübaji asenoki yimsübo benshir saka Tsüngrem denbo tesendaktep mali ta asüba ajanga asenok nem Kotak nungi Tsüngremi ain aser shisatsü magütsür. Aji oda, arogo nungter akümba agi yimsü dak amangba aser arogo nung tenzüka agi Tsüngrem o jembiba agi nübortem tüzuratetsüsa Tsüngrem ain nung asenok mamshitsü. Yisu alima nung aliba mapang nung amato, tanüa nisung ajaki Tsüngrem o jembir saka Tsüngrem ain nung jembirtem agi anünga lir. Tesem ajaklen Tsüngrem o jembir saka nübortemi Tsüngrem o mangatetter kechiyong tejembirtemi nübortemi angatetsüsa Tsüngrem ain nung mejembir. Tanü asenok Tsüngrem dak amanger masü saka yimsü dak amanger amato küma aobaji asenoki Tsüngrem o ain nung mesayutetba, meratettetba aser magizükttetba ajanga lir. Sayutsüngir aikati Tsüngremi agütsüba ain aser shisatsü medeni Laishiba nungi Tsüngrem o jembitsü akok. Farisi aser tezülurtemia yamaji sayu. Yamaji asenoki Laishiba nungi asenoki bilemba ka agiteta tangar ajungshitsüa akok, ajisüaka ibaji Tsüngremi mulungba masütsüa akok. Tejembir o tangar na prongla atema lendongji ibaji lir. Aji oda, kodangsa asenoki Tsüngrem o jembidir, item o ji asenok alima shisatsü nungi masü saka Tsüngremi nungi aruba ain o asütsüsa asenoki kanga kümdanga Tsüngrem den jembitsüla. Kodang, Tsüngrem nungi aruba ain tashi agi masü saka aseni mulungba nung Tsüngrem o jembir asenokji tiyazü ainker akümer. Tanü, item tekümdangtsü agi asen taküm, kibong aser lokti mekütbanga lir. Item lendongtem nungi asenok jenbua alitsü aser teti Tsüngremi mulungba angatetsü, ratetsü aser jembitsü asoshi Tsüngrem dang tashi aser ain meshia sarasadema lidi.

OLEMSABANG BANGPET

- Temjentenzük Changkiri

Tawa whatsapp nung merok mi ama perokshiba, 'ola osang' (voice message) ka onok telok nung medemer kati lemsatet. Lapoka angadang nung asen Naga lima anüdoklen nung alirtem nungi nisung kati yangluba ola ka liasü. Iba olaji tanga masü asen Ao kin anema jembiba ola ka liasü. Asenok aika dangi iba olaji whatsapp ajanga arur alitsü ta amanger. Kü medemer shibai iba 'ola osang' onok telok nung lemsatet, pai yamai zülur yoka liasü, "tangari yamai ashidang asenoki koma bilemer?" Ni bilemer iba olaji angashir pa kanga jashir alitsü! Ni kodang iba olaji tatem tashi angadang, kü mulungi jetta aruba ojang kaji "bangpet" ya aru!

"Bangpet" ojang ya Arok Osep-2019 nung yamai ratetja angur, "teti dang o ashishiba, yimya sübaba, o shilua jembijen jembiba, habitual talk".

"Ao kin majung"; "Yisu osangtajung Ao kin ajanga sayu, Hindu tamangbaa parnok ajanga bener arutsü"; "Ao kin sülenbo manidaktsüla", a.a. Iba ama Ao kin anema jembiba ola ya 'bangpet' ka kümdaktsür ta kü mulungi aru! Asen külem Naga kintem kari, asen Ao kin majungba indang kanga jembir aser aji asenoki teti angashia arur! Hau, asenoka noklang nung noklang shitak lir ta mashir; kechi tashimait lir aji asenok rongnung lemsateper aser yamaji melenshitepa lia aotsü merangteper. Saka mapang aben iba ama mezüngmeshiba o jembiba angashidang temulung kurema bilemer! Ya, yamai dangbo meyütsütsüla!

Langzüksü tim nungbo langzüksüla ta süoki ia ni bilema liasü. Iba jagi ni onok whatsapp telok nung kü bilemba tongmelang agi lemsatet.

Akhidang asen tetsü tebou mapang nung Tsüngrem taochi agi, America lima nungi Dr. Clark ajanga Ao lima nung tesangwa milen tsükloksü; koba milen tesangwa ajanga asen Ao kin-i Naga lima ajak nung nüburtem tenük lapokdakja nüji kümdaktsü. America nungter ka Ao kin dangi Tsüngremi yokba ajanga tanü Naga lima nüburtem iba amai tangar menepa renloker! Tanübo America lima nung nübortem komasa liteper asenoki meteta dang lir. Parnok ajung-majung ajak asenoki angur aser angashir! Tanü America limaji tekartiba ainba, oda, terenloktiba lima ka dang masü, saka alima jabujari yimya tasen aika poktetba lima ka kümer lir! Tatsü agi ashitsü agi, America lima kong nungi asenok tenük

lapokdaktsü, idakji tajunga aser tamajunga kanga kara züina aor ta asenoki meteta lir! America lima nung tanishirtem kar majungba mesüra nüburtem rongnung tamajunger aika liaka, asenoki parnok anema nüngsenbangsen masür!

Parnoki asenok nükpoker ama amang nung alidang, asen tenük lapokdakja tesangwa ngudaktsüba atema pelatsüba dak alaka, par nübur mesüra lenir kar majungba mechi, America kin rangben anema jembiba nungbo iba jagi asen mashimalu dang sayur!

Abenjagi, tang kechi ola ka Naga lima anüdoklen tsütsü nungi Ao kin anema arur, ya tanga masü, "allu tzübu telung nungi asaba ola" ka dang lir ta bilemer! Otsü nung shia aliba ama, allu jagi tzübu tila kaji alima rangben ka ama, idakji pa chuba ka ama, pa dak alema shinga mali ta bilema mapang aben ola tashi adoka tzübu nung jagi asatener! Saka kodang tzünglu tashi agi arur aser tzübuji moshia akümer, alluji tzübu temai adoker aser alima tesadem tenük agi mongujemi alibaji ngur kanga aoksar aser aaka bilema tzübu jagi meyipa iadoker! Iba amaji kodang parnoki tzübu nung jagi adokdir aser alimaji penzüa ngudir, aoksatsü, aaka bilemtsü aser meyipa tzübu jagisa allu amaji tanaben aitsü!

Ao kini kodanga onok sülen dang anidakang ta parnok dang shia malitsü ta ni bilemer! Asen sülen anidaktsü mesüra manidaktsüji parnok mulungsa sürnung, ya kechi ola adoker? Asen sülen anidaktsü atema kodanga parnokji asenoki lisü agi sendaka mayu mesüra yua mali! Asen Ao kinibo parnok tenük lapoktsüogo! Asenokbo sentsüh mali! Ya ngasangatem o jembirba masü mesüra parnok mezüngmeshia jembiba o ka masü! Saka Tsüngremi asen kin nem kechi khuret agütsü aji akokba tashi agi inyakogo aser anosa maneni item nüburtem rongnung inyakdaki.

Tangbo joko parnoka tzübu tema jagi adoker, nüngsenbangsen o masü, saka parnoki kechi angur aser meteta akümer, item nungji amendaker, tajung tamajung bendangteta, parnok sasa par lima nüburtem tarutsü atema telemtetbatem agiteta, tejakleni aotsüba dang sürnung, tang tashi parnok tenük lapokdaktsüba kin anema mulung masüba o dang jembiba jagi parnok tiaji sayur!

Par nüburtem rongnung tangatetba ano iba tashi ya dang angudang kanga meima bilemtsür.

Külen, asenoka tangari asen kin majungba indang 'bangpet' küma tarutsü nungbo mejembitsüsa, asen taküm mapa agi liteta sayutsüsbaji asenok ajak teinyaktsü mapa lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Guwahati nung TLA-ET-i Leaders Formacion ayongzüka agiogo



September 11-15 anogotem nung SVD house, Guwahati nung 'Leaders Formacion' training nung shilem agia adenertem tangokba noksa nung angur. Transforming Leaders in Asia Educational Trust ministry-i ayongzüka training nungji Krima VI Meghalaya nungi Arogo lenir 39 aser Ao Baptist Arogo Mungdang (ABAM) nungi Arogo lenir 19 aden.

Guwahati, Rongjui/ September 16 (TYO): Transforming Leaders in Asia Educational Trust (TLA-ET)-i September 11 nungi September 15 tashi Guwahati nung Leaders Formacion sentong ayongzüka agiogo; iba training sentong ya SVD house, Guwahati nung agi.

Transforming Leaders in Asia Educational Trust ministry indang nukjidongji Asia nung Khristan lenirtem nem training agütsütsü, lenirtem ajungmesotsü aser parnok nem tashi agütsütsü atema lir, koba ajanga Kibuba Yisu Khrista indang osangtajung ajanga Arogotem aser loktiliba nung temelenshi tulu adokdaksütsü.

Iba sentong nung

pastor tem densema ya educational Arogo lenir 60 aden.

Krima VI Meghalaya nungi Arogo lenir 39 aser Ao Baptist Arogo Mungdang (ABAM) nungi Arogo lenir 19 aden. Iba sentong nung shisalen sayur tongti anaji TLA-ET nung Managing Trustee, Rev. Dr. A. K. Lama aser UESI Meghalaya nung State Secretary, Jerry Lapang na liasü.

Leaders Formacion sentong nung sayuba onüktemji Laishiba nung Lai otem teratet aser Inductive Bible Study liasü.

Ajioda iba sentong nung shilem agirtemi iba training nung adenba ajanga parnok tenzüka wadang nung kanga yaritsü, ta lemsatepogo.

TLA Educational Trust

ya educational charitable trust ka lir aser parnok indang tongti nukjidong anajimaongka junga mangurtem aser nungdabapurtem nem shisaliok agütsütsü, skill training agütsütsü, scholarship aser counseling agütsütsü atema lir, koba ajanga loktiliba nung tatongokdak akatsüsa parnok nem tesayuba agütsütsü, ajungmesotsü aser tashi agütsütsü.

TLA Educational Trust ya Guwahati, Assam nung amenoka lir.

2015 küm nungi tenzüka parnoki Arogo nung lenirtem aika nem tesayuba agüja arudar. Item training ajanga tamalen temoatsü/ tajangzük angur 1,000 dak tema lir.

Uganda nung Muslim nunger Khrista dangi aniba atema sayutsüngir ka zükset

Nairobi (Kenya), September 16 (Agencies): September 6, 2023 nü Uganda linük nung Islam yimsü alia amanger Muslim nungertemi arrshi küm 33 sayutsüngir ka züksetogo.

Sayutsüngir, Philip Bere-i Muslim nunger aika Khrista dangi anir aruba atema Muslim nungertemi tejashi nung pa zükset, ta osang ka ajanga metetdaksü.

Kituuti jila nung sentong ka tembangba sülen Philip Bere pa indang bicycle nung Katiryo, Kibuku District-i meyipa aoba mapang nung Muslim nunger kari pa dak azük aser lung tulu kati onset, ta tenük kuli alir kati metetdaksü.

Evangelistic sentong nungji Mudanya Sirasi-i Philip Bere yarisema liasü.

Sirasi-i, iba sentong nungji Muslim nunger tetsürtem aser Muslim nunger lanur tebur ana densema Muslim nunger aikati Khrista agizüka liasü, ta ashi.

Iba sentong tembangba sülen tena Katiryo-i meyipa aoba mapang nung aonung 7:40

ako meta Muslim nungertemi gari lenmang nung mendanga atar tena amak, ta pai ashi.

Osangbener den jembidang Sirasi-i, "Künati lenmang tiplenji nisung kar o jembitepba angashia liasü. Parnoki 'tanü asen züngsemtem Khristan yimsü dangi meyipdaksürtemji tena lir, anungji tena taküm melidaksütsü' ta jembia liasü," ta metetdaksü.

"Nisung ka onok jakdang nokdaka liasü aser pai küna mena aliba bycycle soit aser techira oset kati Bere dak tesülen tsüngoktsü," ta paisa ashi.

Iba mapang nungji Sirasi bo jena oor apu kübok atsükadok.

Muslim nungertem jagi lung tulu kati pa onset, ta paisa ashi.

Muslim nungertemji oadokba sülen Sirasi-i Bere indang tasü mang angu. Pai iba tesem nung aliba Khristantem aser police nem osang metetdaksü. Iba sülen police-i post mortem agitsü atema tasü mangji hospital-i bener ao.

Bere'er Arogo nung pastor-i, Katiryo, Kibuku nung aliba

police ketdangsertemi ken o ka benokba sülen aibelenertem bushi tenzü kogo, ta metetdaksü.

"Ozü sayutsüngiri nisungtem den, talisa Muslim nungertem den Khrista osangtajung sayutsü tejangraba tulu liasü, ibayongji pa tepsetogo," ta pastor-i ashi.

Bere-i anü doklen Uganda nung Buseeta, Lwatama aser Katiryo nung mapang shia Muslim nungertem ayongzüka sayutsüngia liasü.

Uganda linük temzüng aser tanga ozüngtem ajanga linük nung senso ajak nem tamangba yimsü dak sendakba temeden balala agütsür aser pei yimsü tangar den lemsateptsü aser tanga yimsü dangi meyiptsü temeden agüja lir.

Iba linük nung nütsüng shilem 12 dang Muslim nungertem lir aser Khristan nütsüng teimba, ajisüaka anü doklen Uganda nung mapang shia Muslim nungertemi Khristantem anema inyaker aser sayutsüngirtem tepseter.

ANOGO ABEN TSÜNGREM DEN

Ne mulungtet takang


Aser kodang pa temai adoka agizüksü anogo abensa ya adok, pai Yirusalemi aotsü mulung mulunga pa tejak ilenji meyip. Luke 9:51.

Khristan taküm nungi atsüngzüka aotsü temela! Kodang Tsüngremi ne nem kechi inyakdaksüner aji nai angatetta arur na meketa alir ajaki ne mapang aser teyari ajaki ama asütsü! Kodang Yisu asoshi kangki-i atutsü mapang tonga aru, pai pa tejak Yirusalem leni meyip, aji asü nungdang shingai Tebui mulungba menokdangtetsü. Pa temulungtet tejanga ngur Samaria nungeri Yihuda nunger ka parnok yim ajanga Yirusalemi aor bilema parnoki pa magizük.

Yisui pa tenyaba nungi matsüngzüktsü mulungtet saka pai leman nung aika tenzüksü mapang agi pai nütsüng neter temeket townsi yok (Luke 10:1). Pai chitemra akettertem anebtsü (Luke 17:11-19). Temang waka shirangertem anebtsü (Luke 14:1-4). Pai Zachariah kidangi tekümtet bener aru (Luke 19:1-10). Pai maneni nütsüngtem dang sayu (Luke 15:1-32). Yisu Kalvaryi atudang Pai tangar tenzüksü mesongtem saka Tebui mulungba nungi atsüngzüktsü pai memelung.

Tsüngremi ne nem kechi inyakdaksüner nai metetta lira, ibaji atalokdaksütsü bendanga mulungtetter, ne tejak mulung mulunga iba tsütsü meyipang (A. Shin 4:25). Tangar matsüngdang na Tsüngremi aniba kuliji ne temulungtetbaji asütsü. Na meketa mapang tajungi (opportunity) Tsüngremi na ajaba alizüng nungi matsüngzükdaksütsü kümdangang. Tatitangbai tashi angatsü menua tekümdaksü mesüra tesentokdaksü. Nai Tsüngrem nungi tejangja mapa agizük, ne tashi angaba nung mainshi inyaksüla.

Affirm Films-i 'Journey To Bethlehem' film indang trailer sayaogo



September 16, 2023: September 13, 2023 nü Sony Pictures' AFFIRM Films (aser Monarch Media)-i 'Journey to Bethlehem' film indang official trailer sayaogo.

Iba film nung tongti shilem agirtemji M?RIAH, Joel Smallbone & Lecrae lir aser iba film ya taküm November 10 nungi tenzüka theaters nung sayatsü.

Film & TV music Director, Adam Anders-i album million 100 dak tema yokzükogo, Grammy nominations pezüben atongtepa angu, Golden Globes award ana aser People's Choice Awards ana nguogo; iba dak alia Billboard Hot 100 nung ken aika züngsemogo.

Film Director, Anders-i, "Iba film (Journey to Bethlehem) yanglutsü atema küm aika jakdang ni apiteta liasü. Christmas mapang ozü kibong züngsemtem den külemi

reprangtsü atema ni musical ka bushiba mapang nung ni iba ya apiteta liasü," ta ashi.

"Ni iba film ya taruba Christmas mongpu nung Bethlehem nung petinu sangwaba ama tesangwa ka südaksüner," ta paisa ashi.

Laishiba nung Bethlehem-i aoba otsü nung ajemdaker yangluba musical film 'Journey to Bethlehem' indang official trailer ya tan hopta sayaogo. Iba film nung Mari aser Yosef na indang otsüji tanü-asüng musical background nung sayatsü.

Journey to Bethlehem film ya taküm November 10 nü theaters nung sayatsü aser iba film ya Affirm Films indang mezüngbuba musical asütsü.

Affirms Films-i tamalen War Room, Fireproof, A Beautiful Day in the Neighborhood aser Miracles from Heaven film tem sayaogo.

AO OSHI ANGAZÜKDAK:
TANÜ ANGAZÜKTSÜBA OJANG



Sala

(v) alena aliba chiok, lapok (release)

* Sepaitemi pa alener aliba sala aser chitem **sala** chiyongdaktsü.

Salang

(n) yimten ken o jembidak (village council court)

* Yimten **salang** nung yimkong adenshia telemtetba agi.

OLONG PAITEP # 6639

1		2		3		4	5			
				6						7
		8								
9				10		11				
				12					13	
						14				
16						17				

TIPILEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S _ _ _ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzuma nung senzuba - (5)

OLONG PAITEP # 6638 TELANGZÜBA

TIPILEN :

- 1. Tenü, 3. Tapok, 5. Kwi, 6. Repji, 8. Ainer, 10. Tenük, 11. Azük, 13. Asentzü, 14. Posü, 15. Tan, 18. Kinük, 20. Aginü, 22. Emk, 23. Dokan, 24. Tang.

LANGTSÜNGLEN :

- 1. Tara, 2. Nep, 3. Tia, 4. Pungzü, 5. Kin, 7. Jensü, 9. Raks, 11. Azüing, 12. Apok, 13. Asenok, 16. Aak, 17. Süng, 19. Ken, 21. Ita.

KHEN SHISADANGDI

ARISHIA ALIR TANTSÜR TAMBUR OTSÜ :

Tambuji joko kum 100 junger aser tantsüji kum 95 tain saka ano yakyak-yakyaker asüba agi osang zülur kati interview agir.

Osang zülur : Obou aser otsü, nena kum nung kanga tain süaka tang tashi yamai smart süa aliba ya ngur onok kanga süngmanger, oda nena arishia aliba ya miim tasa kar aliasü ta metetner ato.

Tambu : Kanga shitaka, küna kibong kümli nungi tenangzüktepba ka yur liyonga arur, küna tsüingda kodang mangatetepi raratepdir, shiba tai südir pa mesüra laji kilometre 5 jajatsü lemtet, aser yamaji nisa tai asüji anogo shia kilometre 5 jajaba agi yamai temang junga alir ati.

Osang zülur : OK, süra otsüla kechi reason agi yamai kümküma alir?

Tambu : Anogoshia ni temerenshiji shitak inyaker asü masüar metettsü la-a ni lahdanga anogoshi kilometre 5 jisa jaja ati.

Osang zülur : Wonderful!

- WhatsApp

Centre-i COVID-19 ajanga Rs 3,500 crore magütsü: Mizoram CM

Aizawl, September 16, 2023

(Agencies): Centre sorkari tesüba kum 3 tsüingda COVID-19 wara ajanga Rs 3,500 crore magütsüteter ta Mizoram Chief Minister Zoramthanga-i ashi.

Aizawl nung Mizoram Engineer Service Association (MESA) indang lokti mungdang nung pai iba osang ashi.

"Senotsü manguba ajanga state sorkari teinyaktsütem meinyakteter. Item khuret aser tenokdangbatem ajanga asenoki inyaknuba meinyakteter aser mapa nung nisung tasen meshimokteter" ta Zoramthanga-i ashi

Mizoram Engineer Service



Zoramthanga

Association (MESA)-i akhangbatem aser tanga services indang nungdaktem meteta lir. Sorkari akokba tashi sorkar mapa inyakerem yaritsü ta paisa ashi.

"Mizoram nung ali rongsen jenti moaja lir, tsüingsang-

mopung tajung aser tzü peria lir. Engineer temi akokba tashi state nungi rongsen agitettsüla aser tangar dak memetalaloki litetba state ka kümdakjang. Engineer temi state renloktsü atema inyaktsü ayongzüker" ta CM Zoramthanga-isa metetdaktsü.

MESA ya 1972 kum züingsem 8 agi tentet. Tang iba telok nung züingsem 332 lir.

Parnokji PWD nungi 144, Power and Electricity department nungi 73, Public Health Engineering department nungi 67 aser I&WR department nungi 16 lir. MESA nung life members kar dena tang züingsem ajak agi 363 lir.

Manipur Governor-i Kangpokpi district nung relief camps semdang

Imphal, September 15, 2023

(Agencies): Manipur Governor Anusuiya Uikey-i September 15 nü Kangpokpi district nung aliba relief camps semdanga liasü.

Kangpokpi Assembly Constituency nungi MLA aser Textiles, Commerce, Industry, and Cooperation Minister Nemcha Kipgen-i la meina senzü.

Iba mapang district ktdangsurtem aser Red Cross Society Senapati nungi teshimet nübotem aden. Governor Uikey-i internally displaced persons (IDPs) den ajurutepa parnok nungdakbatem metettsü merang.

Governor Uikey-i Champhai Sub Division nung aliba DIET

Relief Centre semdang. Iba Centre nung kibong 153 aser IDPs 600 shi jenoka lir.

Lai blankets, mosquito nets, hygienic kits, utensils agütsü. Governor-isa mashisa aliba tetsürtem aser kinü tanur aliba tetsütem den IDPs shiranger nem senotsü teyari agütsü.

Governor Uikey-isa Kangpokpi town kübok Mandap Hall nung lapoka aliba relief camp semdang. Iba nung kibong 60 aser IDPs 275 jenoka lir. Laisa iba kasa jila nung ITI nung lapoka aliba relief camp semdang. Idakji kibong 168 aser IDPs 770 tashi jenoka lir.

Relief camp anaprong nung lai nungdakba relief items aser senotsü teyari agüja liasü.

Governor Uikey aser

Minister Nemcha Kipgen nati Internally Displaced Children nem amtsük, achiajemtsü aser parnok nungdakbatem agütsü.

DC Kangpokpi Conference Hall nung senden ka amendang Governor Uikey, Minister Nemcha Kipgen, DC Kangpokpi aser SP Kangpokpi nunger aden.

Governor Uikey-isa September 12 nü Ireng Naga aser Kharam Vaiphei tsüingda khasetba kibongtem den ajurutep.

Lai parnok dang sorkari tanurtem shisaliok bushiba nung yaritsü aser senotsü teyari agütsütsü nangzüker. Governor-isa iba lendong nung asür kibong shia nem Rs. 10 agütsütsü nangzüker.

Tipra Motha-i Central Working Committee ka tentetogo

Agartala, September 16, 2023

(Agencies): Tripura nung opposition party tongtiba Tipra Motha-i Central Working Committee (CWC) ka tentetogo.

Tripura chuba jabaso aser taoba Tipra Motha chairman Pradyot Kishore Manikya Debbarma-i taruba hopta ishika tsüingda party akangshitsü aser primary nungi central

committee tashi tentettsü osang metetdaktsüogo.

"Ni maongka ka ama züingshir aser ajemalushir. Ni akokba tashi taruba hopta ishika tsüingda primary, regional, block, district aser central committee tentettsü" ta Manikya Debbarma-isa ashi.

Central Working Committee (CWC) nung

president Bijoy Kumar Hrangkhawli-i sign süa lir.

CWC nung tanüingba züingsemtem- Pradyot Bikram Manikya, Tripura Tribal Areas Autonomous District Council (TTAADC) Chairman Jagadish Debbarma, Leader of Opposition Animesh Debbarma, taoba minister Mevar Kumar Jamatia aser MLA Brishaketu Debbarma.



Assam police-i September 15, 2023 nü Guwahati nung international cyber fraud racket ka makdokba mapang call centres aser taila customer service centres nung inyakerem kar apuba noksa nung angur. Assam Police-i call centres nung inyaker nisung 191 tashi apu. Parnok rongnung tebur 144 aser tetsür 47 dena lir aser parnok ya Punjab, Delhi, Uttar Pradesh, Bihar, West Bengal, Assam, Meghalaya, Manipur, Nagaland aser Tripura nungi arurtem lir. Iba maparen nung tongti süa tai tongloktsür nisung asem- Debajyoti Dey (David), Rajan Sidana aser Divyam Arora nunger puogo.

Ukraine tir Zelensky-i Joe Biden den ajuruteptsü



Kyiv, Rongjui/September 16 (Agencies): Ukrain tir Volodymyr Zelensky-i tang agi tanabenbuba taruba hopta Washington semdangtsü, ta White House-i Hokolbarnü sangdong ka ajanga metetdaksüogo.

Tir Joe Biden den sensaksemtsü aser US Congress nung senden ka ayongzüka amentsü atema Zelensky Brehostibarnü White House-i aotsü. US Congress nung Republican Party pur atidakba mapang ka lir kechiyong Biden-i Ukraine atema package tasen ka agütsütsü asoshi inyaktepba mapang ka lir.

New York nung UN General Assembly nung linük balala lenirtem den ajurutepba sülen Ukraine tir ya Washington-i aotsü.

Biden indang national security advisor Jake Sullivan-i ashiba agi, Ukraine-i Russia nung mintoktsü merangba mapang ka nung tang tir-i US semdangtsü.

Biden-i, Ukraine parnok nüjiso, sovereignty aser litsü kümzüka ayutsü tema raraba mapang alima kintemi Ukraine yariba nung tongtisür inyaksangshia aliba tali bendanga agütsüshitsü, ta Sullivan-i osangbenertem dang ashi.

Ajisüaka US-i teyari agüja aruba nung ken o mejangjai kümogo, kechiyong Congress asoshi senotsü teyari agütsütsü aliba agizüktsü atema September 30 nü ya tatabangbuba nogo lir, kechiyong election season tonga arudar.

Taoba tir Donald Trump-i US-i Ukraine nem teyari agütsüba aitsüogo aser ashiba agi, item sentem ya kidang intokba tajungba asütsü.

Ajisüaka Republican tem rongnungi Senator Mitch McConnell aser party senate lenir nungeria Ukraine nem teyari agütsüba pusama arudar.

"Iba atema party anapronglai teyari agütsütsü onoki temulunglema bilemer

aser tir Zelensky-ia yamaji bilema alitsü ta amanger aser pai iba dak ajemdaker tejakleni oner," ta Sullivan-i ashi.

Ukraine-i June ita nungi tenzüka Russia nungertem mintoktsü merangdar, ajisüaka iyakyim kanga meyilongi odar aser iba ajanga Kyiv nem teyari agütsüba dak sendakba nung anüolen aliba linüktem nung yimden yimsüsüba tsütsü olangtep tenzüko.

Ukraine-i Russia nokdangtsü merangba mapang ka nung United States-i security dak sendakba nung USD billion 43

agütsüogo. Biden-i taoba hopta Congress dang ano Ukraine atema USD billion 40 meshia liasü, koba emergency defense aid, rongsenketzüng aser humanitarian assistance atema lir.

2022 küm February ita nungi Russia-i Ukraine amak tenzüka sülen Zelensky-i tang agi tanebenbuba Washington semdangtsüba lir. December ita pa meima US yimtibai ao, koba rara mapang pa bendangleni aoba mezüngbuba liasü.

Kasa mapang nung Biden-i taküm February ita Kyiv semdangogo.

SANGDONGER

I, Tajungrenla Ozukum, D/o. Lt. Lanumongba Mollier from Tuli, Mokokchung change my name to Tajungrenla Mollier vide Regd. No. Judl. 16/2022/388, Dated : 12/08/2022 for all future purposes.

Anogo 8 sülen Pak-Afghan Torkham arrtsü lapokogo

Islamabad, Rongjui/September 16 (Agencies): Pakistan aser Afghanistan border force tsüngda mangatetep adoka arrtsü nung lenmang tongtibang ka anogo ti tashi shibangba sülen Hokolbarnü lapokogo.

Linük anaprongla nungi arrtsü anükertem khatepba sülen Pakistan-i September 6 nü Torkham arrtsü shibangja liasü. Arrtsü nung Taliban ketdangsürtemi ozüng alema kiojentem amenokba atema aitsüogo.

Pakistan sorkar ketdangsür Nasir Khan-i ashiba agi, arrtsü nung lenmang Hokolbar anepdang lapoktsüogo aser iba ajanga arrtsü anatsülen taolen makai aliba senzusenpongertem aser khu abenba garitem asoshi anisungzükg agütsüogo. Torkham nung Afghanistan indang Commissioner Ismatullah Yaqoob-i ashiba agi, khu abenba tata garitem aser senzusenpongertem arrtsü ajanga ao tenzüko.

Afghan national identity card bena lir saka senzusenpongtsü atema kuli kakat tapet bena

maliba Afghan nungertem Afghanistan-i meyipa aotsü atema anogo asem lapoktsüogo, ta Dawn osang kakat sangdong ka ajanga metetdaksü.

Torkham nung immigration ketdangsürtemi ashiba agi, arrtsü lapokba sülen Pakistan nungera linüki meyipa aruogo aser nikongtsütsü tashi nung Afghan nung 10,000 dak tema arrtsü anatsülen nungi arrtsü adenogo.

Pakistan aser Afghanistan Joint Chamber of Commerce nungi züngsem kati iba jenjang agiba pelashishia agizükogo, "arrtsü lapoktsüba ajanga anogo teku tashi linük anaprongla nungi shishilembartem timtemtepa aliba anenogo," ta Ziaul Haq Sarhadi-i ashi. Shizüka aoba chiyongtsü shishilembartem kanga akoksaogo, ta paisa shisem.

Afghan nung litsü ya Pakistan amaktsü atema mamshidaksütsü atema kabul nung foreign ministry-i tenangzükg agütsüba sülenang Islamabad nung ketdangsürtemi Torkham arrtsü lapoktsütsü mulunga liasü.

Russia-i Kim dang hypersonic missile, nuclear-capable bomber tem sayu



Moscow, Rongjui/September 16 (Agencies): North Korea lenir Kim Jong Un-i, Russia indang space, military aser technological facility tem semdangba mapang Russia indang hypersonic 'Kinzhal' missiles aser strategic, nuclear-capable bomber tem asadangogo, ta Russia nung media sangdong balala ajanga metetdaksü.

Russia kübok Primorsky tesem indang angh Oleg Kozhemyako-i, Kim Honibarnü Artyom yimti tonga aruba sangdongogo, koba Vladivostok nungi km 40 shi pilar lir.

Kim pa indang jurila armoured train nung menerema ayazüka aluba aser tanurtemi pa nem nara agütsüba video ka Kozhemyako-i lemsatepa liasü.

Artyom atongba sülen Kim yimti tezülen aliba Vladivostok airport-i ao kong pa dang Russian Defence Minister Sergei Shoigu aser tanga military ketdangsür tejentemi Russia

indang nuclear-capable strategic bomber aser raradang amshiba tanga tayimtsütem sayua liasü.

Shoigu-isa, Kim dang Russia indang tesüsübuba yangluba hypersonic Kinzhal missile sayua liasü. Kinzhal ya air-launched ballistic missile ka lir aser iba yagi nuclear mesüra tanga conventional warhead tem benteter.

Kinzhal indang range ya 1,500 nung 2,000 km lir aser iba yagi payload seret 480 benteter. Iba missile ya speed of sound dang nungi 10 ben agi tekaraba senzütettsü (12,000 kph mesüra 7,700 mph). Russia-i ashiba agi, parnoki mezüngbuba Ukraine nung hypersonic missile tem amshiogo.

Maneni Kim dang strategic bombers; Tu-160, Tu-95 aser Tu-22M3 ta model asem sayuogo, koba Ukraine den rara nung Russia-i missile pokloktsütsü asoshi amshia arudar, ta Russia indang

aviation technology kanga kar renloka aoba ngua parnok nem tenüngsang agütsü aser ashiba agi parnok indang technology yagi parnok amokmerener ajak ajatettsü. Iba osang ya Russia nung media balalaia sangdonga liasü.

Russia indang cabinet-i Hokolbarnü sayaba video ka nung Kim sabang ka nung nokdaker Su-57 warplane indang cockpit ka repranga iba tayimtsü indang pilot-i tayimtsü indang rasa ashiba anga aliba nguogo. Su-35 fighter jet ka yimya sayua anenba sülen Kim-i teka ma agizükba kasa video ajanga sayuogo.

Mongintemi ashiba agi, Kim-i Russia semdangba sülen linük ana tsüngda military dak sendakba nung tesendaktep yanglushitsü aliba nung North Korea indang outdated air force modernize asütsü densema alitsü akok, kechiyong parnok tang tashi 1980s nung Soviet Union-i yokba tayimtsütem amshidar.

Putin aser Kim na Bodhbarnü ajurutepba mapang military ken o, Ukraine nung rara, aser tesendaktep akangshitsü atema sensaksemogo, ajisüaka Russia nung lenir yagi ashiba agi, parnoki temzüng ozüng alema kecha inyaksangshi masütsü.

Ajisüaka United States, Russia-i North Korea ket nungi artillery aser rocket tem alizüktsü atema sensaksemdar ta metetdaksüogo. Item artillery aser rocket tem ya Ukraine rara nung amshitsü akok.

Interfax news agency sangdong ka ajanga metetdaksü.

"Iba tayimtsü ya Moscow nungi Japan-i orr meyipa arutettsü," ta Shoigu-i Kim dang tayimtsü indang rasa ashiba mapang metetdaksü.

Kasa mapang nung tayimtsü nungi missile koma akhar iba indang Kim-i asüngdanga liasü. Russia nung ketdangsür kati pa dang strategic bomber tem ya Russia indang nuclear force nung tongtibang shilem ka lir ta ashi.

Russia kübok Vostochny ? osmodrome spaceport nung Bodhbarnü Russia tir Vladimir Putin den senden mena tenzükgba sülen North Korea nung lenir yagi Hokolbarnü Russia indang Su-57 fighter jets yangluba yimti Komsomolsk-on-Amur semdanga liasü.

Pyongyang indang official Korean Central News Agency-i Honibarnü sangdong ka ajanga ashiba agi, Komsomolsk-on-Amur aircraft plant semdangba mapang Kim-i Russia indang

India Asian Games squad nung Sandesh Jhingan densemogo



Sandesh Jhingan

Rongjui/September 16, 2023 (Agencies): All India Football Federation-i Hokolbarnü sangdongh ka ajanga Hangzhou, China nung asayatsü aliba Asian Games atema India football team nung Sandesh Jhingan züngoksema sangdongogo.

Jhingan den külemi AIFF-i ano team nung Chinglensana Singh aser Lalchungnunga ta asayar ana talila anisemogo.

AIFF-i Naorem Mahesh Singh team nung maniook tsüingda medical test ka agitsü.

India team nungi Jhingan asayadaksütsü asoshi Indian

Super League season 10 nung FC Goa pur mezüingbuba asaya Hyderabad FC den asayatsü aliba thinentüsügo.

Asayamung dak sendakba nung AIFF tir Kalyan Chaubey-i, "Asian games masaya tsüingda jenjang tajung kar agiogo, kechiyong Indian attack aser defence nung Sunil Chhetri aser Sandesh Jhingan nati tongtibang shilem agitsü. Maneni experience asayar kar team nung züngoksema aliba atema onok pelar," ta ashi.

Kalyan Chaubey-isa, FSDL dang kanga pelaba lemsatepogo, kechiyong

parnoki India team nem teyari agüja Indian Super League nung asayar ka melensitsüogo, koba September 21 nü tenzüksü. Paisa, asayartem chiokba aser anogo kar kasa mapang nung tenchitepba dak sendakba nung mangatettep aliba bentettsü atema AIFF den teka amteper inyakba atema stakeholder ajak dang kanga pelaba lemsatep.

Kasa mapang nung India head coach Igor Stimac-i, "asayar tejen kar Asian Games squad nung züngoksema atema pelar, shirnoki team nem teyari agütsütsü. Iba ya ataloktsüba atema ajak dang kanga pelar," ta ashi.

19buba Asian games atema India tebur football team yamai alitsü:

Goalkeepers: Gurmeet Singh, Dheeraj Singh Moirangthem.

Defenders: Sumit Rathi, Narender Gahlot, Deepak Tangri, Sandesh Jhingan, Chinglensana Singh, Lalchungnunga.

Midfielders: Amarjit Singh Kiyam, Samuel James Lyngdoh, Rahul KP, Abdul Rabeeh, Ayush Dev Chhetri, Bryce Miranda, Azfar Noorani, Vincy Barretto.

Forwards: Sunil Chhetri, RahimAli, Rohit Danu, Gurkirat Singh, Aniket Jadhav.

Head coach: Igor Stimac.

Maheesh Theekshana Asia Cup final nung masayatettsü



Maheesh Theekshana

Rongjui/September 16, 2023 (Agencies): Sri Lanka nung spinner Maheesh Theekshana yiruba ajanga India den Asia Cup final asayatsü aliba nung shilem magitettsü, ta captain Dasun Shanaka-i Honibarnü metetdaksü.

Arishi küm 23 tain Theekshana ya Pakistan akokba asaya nung hamstring yirua liasü. Iba asaya akokba ajanga parnok final tongteta liasü. Taküm Asia Cup ya taruba ita India nung ODI World Cup asayatsü aliba atema renemshiba asayamung ka lir.

Shanaka-i Colombo nung osangbenertem den sensaksema mapang ashiba

agi, "pa final asaya nung shilem magitettsü kechiyong pa yiruba ya Grade 3 lir, saka pa World Cup nungbo shilem agitettsü."

Theekshana-i iba asayamung nung team atema kanga junga asayaogo aser pai asaya pongu nung wicket ti agia liasü. Pai pacer Matheesha Pathirana aser külem spinner Dunith Wellalage nung den külemi team tanga tashi kanga nongita asaya aruogo.

Theekshana temang anepaluba mapang pa melena top-order batsman Sahan Arachchige squad nung adentsü, ta Sri Lanka Cricket sangdong ka ajanga metetdaksü.

Asayamung akoktsü imlartem rongnung züngoksema meliaka Sri Lanka team 11buba Asia Cup final tongteto aser iba asayamung tenetbenbuba akoktsü maongka lir.

Sri Lanka team-i Afghanistan pur akokba sülen Super Fours-i aser Super Fours stage nung India mekokaka parnok final tongteto.

"Asayartemi linük asoshi takok nguner," ta Shanaka-i ashi. "Team ka ama onok underdogs liasü, anungji ajaki sabang tuluba ka nung junga asayaner. Lanur asayartem yagi parnoki kechi inyakteter aji alima dang sayutsüla," ta paisa ashi.

Lyon head coach mapa abentsü Fabio Grosso shimogo



Fabio Grosso

Rongjui/September 16, 2023 (Agencies): Tang junga masayatei aliba French club Lyon-i parnok indang head coach asütsü atema taoba Italy nung Fabio Grosso Honibarnü shimogo.

Season kanga mejungi tenzüjkba sülen Laurent Blanc aser club na tangatettep nung pilaogo aser tang Grosso-i pa tassenba nung asaya pezü asayaba sülen point ka dang nguteta lir aser parnok ponglang nung lir.

Lyon-i ashiba agi, arishi küm 45 tain Grosso den season tatem tashi tenangzüktepba ka yangluogo aser ano season talila ka atsülangtsü atema lenmang sadema lapoka yuogo.

Deobarnü team pur Le Havre den kidang asayatsü

aliba repringba sülen pai Hombarnü nungi club coach mapa agizüka inyak tenzüksü.

Le Havre den asaya ya deputy coach Jean-Francois Vulliez-i achaayanga asayatsü.

Grosso ya attack süa asayaba left-back ka liasü aser pai 2006 küm Italy team nungi World Cup dena koka lir.

Pa 2007 nungi 2009 tashi Lyon nungi asaya 75 nung shilem agi aser iba mapang 2008 küm league aser French Cup dena kokogo. Iba mapa Lyon puri French league amokbanger asaya liasü.

Taoba season pa Italy nung Frosinone indang coach liasü aser pa lenisüba nung par team-i second-tier Serie B title bena pa dak coach mapa inyaksü sempet aliba sayuogo.

La Liga-i West Bengal nung football academy amenoktsü

Kolkata, Rongjui/September 16 (Agencies): Spanish football league La Liga-i West Bengal nung lanur asayartem anitettsü atema academy amenoktsü asoshi state sorkar den tenangzüktepba yangluogo, ta ketdangsür kati Hokolbarnü metetdaksü.

West Bengal Chief Minister Mamata Banerjee aser La Liga tir Javier Tebas na Madrid nung senden ka amenba mapang tenangzüktepba ka nung sign süogo, ta pai ashi.

Banerjee shiba anogo 12 atema Spain-i oa lir lai Tebas den Madrid nung Brehostibar nikongtsütsü ajurutepa senden ka mena liasü, koba saisapong aser sobaliba institution tem sendaktepa tesendaktep akangshitsüba dak rangloker agiogo.

"Iba MoU ya sportsmanship aser anema alitsü atema ajungshitsü asoshi football asaya ajungkettsü atema lir. La Liga-i West Bengal nung football training academy amenoktsü," ta ketdangsüri ashi.

Tenangzüktepba nung state nung coach aser asayartem La Liga nungi coach temi training agütsütsü.

Parnokisa, West Bengal nung football club tem tangar dak metaloker melidaksütsü atema parnok tajangshibatem aser expertise lemsateptsü, ta ketdangsüri ashi.

Banerjee meina taoba BCCI tir Sourav Ganguly aser Kolkata football club; Mohun Bagan, East Bengal aser Mohammedan Sporting Club nungi ketdangsür tejentem oa liasü.

Banerjee-i, West Bengal semdangtsü asoshi Tebas jaok aser pa dang friendly asaya ka nung shilem agitsü mepeshia liasü.

"Na tejaoker ka ama arua Bengal nung football asayaba ajangshidangang. Bengal nung football asaya koda jangradema repranger aser asayar aji kecha dena medemdangtsü makok," ta lai La Liga tir dang ashi.

Iba dak sendakba nung pai, "Bengal ya football asayartem anitetba tesem ka aser India nung asayar tajungtibatem iba tesem nung anitetogo," ta ashi.

Kasa mapang nung Ganguly-i ashiba agi, academy amenokba ajanga state nung sempet aketba asayartem anitettsü.

BIEMDANGANG

"Mulungsentsü lapok nungang mapa inyaktettsü."